



200-jarige herdenking van die eerste AKV in 1824

Om *Blitspos* te ontvang, stuur 'n e-pos na bladuitleg@nhk.co.za of grafies@nhk.co.za en versoek dat u naam op die versendingslys geplaas word

Nuus, berigte en kort kommentaar (uiters 100 woorde) aan produksie@nhk.co.za

Webblad van die Hervormde Kerk www.nhka.org

Die redaksie aanvaar verantwoordelikheid vir die inhoud. Menings deur skrywers uitgespreek, is egter nie noodwendig die beleid of standpunt van die Hervormde Kerk nie.

Die Kommissie van die Algemene Kerkvergadering het besluit dat die Hervormde Kerk in 2024 deelneem aan die herdenking van die eerste AKV wat in 1824 vergader het.

Die AKV van 1824 was die eerste sinodale vergadering in die geskiedenis van Suid-Afrika. Tydens die AKV van 1824 is 'n kerkorde vir die Hervormde Kerk opgestel. Die titel van die kerkorde was *Algemeen Reglement voor het bestuur der Nederduitse Hervormde Kerk, in Zuid-Afrika, ontworpen in de Algemene Kerkvergadering, gehouden binnen de Kaapstad, op den 2 November, en volgende dagen van het jaar 1824.*

Dit is belangrik dat die Hervormde Kerk, as een van die reformatoriese kerke in Suid-Afrika, hierdie historiese gebeurtenis met dankbaarheid herdenk. Dit sal ook deur ander kerke, soos die NG Kerk, herdenk word omdat dit 'n belangrike deel van ons gemeenskaplike erfenis vorm.

Die volgende projekte word in die vooruitsig gestel:

- Kerkrade word versoek om eredienste op Hervormingsondag (27 Oktober 2024) só in te rig dat die gebeure van 2 November 1824 aan die orde kom.
- 'n Nasionale feesdiens sal op 3 November 2024 in Pretoria plaasvind, en die NG Kerk word versoek om 'n soortgelyke geleentheid in Kaapstad te reël.
- 'n Boek met die titel *Geskiedenis van die Hervormde Kerk 1824 tot 2024* sal teen September 2024 beskikbaar wees. Die boek beslaan meer as 300 bladsye en vertel die verhaal van die Hervormde Kerk aan die hand van belangrike besluite van die AKV.
- 'n Konferensie vir lidmate en predikante waaraan kerkhistorici sal deelneem, word vir November 2024 beplan. Die konferensie word aangebied deur die Hervormde Teologiese Kollege, die Sentrum vir Reformatoriese Teologie en die Kerkhistoriese Genootskap.
- Daar word deurlopend artikels in die kerklike tydskrifte soos die *Almanak* en *Die Hervormer* gepubliseer.
- Tans word die moontlikheid ondersoek om 'n *Junior Algemene Kerkvergadering* te organiseer, waaraan jongmense kan deelneem en waar hulle kan praat oor die toekoms van die Hervormde Kerk.
- Die ringsvergaderings van 2024 kan daadwerklik aan die saak aandag gee, onder andere om weer (soos in die verlede) verteenwoordigers van die susterskerke uit te nooi om dit by te woon, maar veral om verteenwoordigers van die Maranatha Reformed Church of Christ, voorheen die Hervormde Kerk in Suidelike Afrika, uit te nooi om die ringsvergadering by te woon. Die MRCC het ontstaan vanweë die sendingwerk van die Hervormde Kerk, en dit is belangrik dat die verhouding weer versterk word.
- Die moontlikheid van gesamentlike byeenkomste met ander kerke word ondersoek, en kan ook op plaaslike vlak plaasvind. Dit kan die band tussen die reformatoriese kerke versterk.

Dr Wouter van Wyk
Sekretaris: Kommissie van die AKV

Lief en leed

- Baie geluk aan **ds Leanie en Edu Lemmer** van Bellville met die geboorte van hul seun Ben Roux Lemmer.
- **REGSTELLING:** In *Blitspos* van 29 Februarie 2024, en in *Die Hervormer* van April 2024, is berig dat **Gemeente Alberton** op Sondag 25 Februarie afskeid geneem het van **ds PB (Pieter) en Susan Viljoen** na 'n volle 38 jaar. Hulle was sedert 12 Januarie 1986 Alberton se predikantspaar, en nie sedert 24 Mei 1986 soos in die berig genoem is nie. Ds Viljoen is op 24 November 1983 gelegitimeer, op 6 Mei 1984 in Weskus georden, en op 12 Januarie 1986 in Alberton bevestig. Ons plaas graag die korrekte inligting!



Die volgende predikante verjaar tot 3 Mei, en word hartlik geluk gewens:

- Donderdag 25 April: Prof AG (Andries) van Aarde (73) (emeritus) en dr WAJ (Wimpie) van Schoor (61) (Primrose-Oos)
- Vrydag 26 April: Ds HPF (Paul) Kern (72) (emeritus)
- Saterdag 27 April: Dr KD (Kálmán) Papp (72) (emeritus)
- Sondag 28 April: Ds P (Pieter) Rossouw (38) (Mafeking/Zeerust)
- Woensdag 1 Mei: Ds NM (Nick) Alberts (60) (emeritus)
- Donderdag 2 Mei: Ds HJ (Henk) Labuschagne (34) (Silverton)

Gemeentes en bediening

- Enige saak wat volgens die Kerkorde onder die aandag van die **Moderamen** gebring moet word, moet mev Karen Breedt (karen@nhk.co.za) asseblief **teen 29 April** bereik **vir 10 Mei** se Moderamenvergadering. **Geen laat sake** sal in die agenda opgeneem word nie.
- Die Moderamen bedank die **dosente van die Kerk** vir hul uitnemende werk en akademiese prestasies oor die jare, en terselfdertyd vir hul hoogs gewaardeerde diens as predikante in gemeentes van die Kerk en in sinodale verband.
- Die Moderamen neem kennis daarvan dat **ds M (Marsulizé) van Niekerk** 'n beroep na die NG Kerk aanvaar het en bedank haar vir haar dienswerk in die Hervormde Kerk. Gemeente Upington moet 'n akte van losmaking aan ds Van Niekerk oorhandig.



Ds Marsulizé van Niekerk

- **Leef jou lied: Feeskonsert.** Ter herdenking van die eerste Protestantse liedboek 500 jaar gelede en die eerste Afrikaanse liedboek 80 jaar gelede, word daar op **Sondag 28 April om 15:00** 'n groot feeskonsert gehou as deel van die Hervormde Kerk se viering van die twee geleenthede. Dit vind plaas by **Gemeente Pretoria-Oos**. Daar sal samesang wees saam met die orrelis Pieter van den Berg, 'n koperblaas- en houtblaas-ensemble onder leiding van Braam van Tonder, en 'n koor onder leiding van Gideon Els. Die spesiale feeslied wat vir die historiese geleentheid geskryf is, sal ook saamgesing word. Vir kaartjies, kontak gerus vir Pieter by 072 041 3954.
-
- **Gemeente Glencoe** se nuwe e-posadres is nhkglencoe@nhk.co.za. Die e-posadres nedhkglencoe@gmail.com verval dus.
 - **Werkruimte vir deelydse bediening: Gemeente Meyerton.** Aansoeke word ingewag van gelegitimeerde predikante van die NHKA of die NG Kerk om die werkruimte te vul na die siekte-emeritaat van die vorige predikant.

Gemeente: Die erediens en suiwer Woordverkondiging staan sentraal in die gemeente. Kontak met die lidmate en huisbesoek is baie belangrik. Die gemeente reik ook uit na die gemeenskap met verskillende projekte. Die gemeente is 74 jaar oud en het 135 belydende lidmate en 30 dooplidmate. Die kerkgebou is in Meyerton (op die hoek van Reitz- en Holidaystraat). Die pastorie is tans nie beskikbaar nie.

Vergoeding: Die gemeente kan die predikant vergoed met 'n totale pakket van R270 000 per jaar.

Leraarsprofiel: Die leraar moet lief wees vir die Here en sy kerk. Die Hervormde identiteit en etos is vir die gemeente belangrik.

Aansoeke sluit op 31 Mei 2024. Aansoeke moet vergesel wees van 'n CV en 'n kort verslag van die kandidaat se VBO-krediete. Met ontvangs van die CV sal 'n vraelys aan u gestuur word. Die vraelys moet eerlik en sorgvuldig ingevul word. Dit moet per e-pos gestuur word aan die skriba (Sollie Benson) by solriebenson0@gmail.com. Enige ander navrae kan ook aan hom by 082 686 5949 gerig word. Aansoekers moet beskikbaar wees om 'n erediens by die gemeente te kom lei. Alle aansoeke word vertroulik hanteer. Die kerkraad is nie verplig om een van die aansoekers te beroep nie.

Vergaderings

- Vrydag 26 April: Oudit- en Risikokomitee
- Dinsdag 30 April: Teologiese Opleidingsfonds (TOF)
Beurs- en Leningskomitee van die TOF

Kerklike publikasies



Bybelse Dagboek / Almanak 2024
R200 (versending uitgesluit)

Kry belangrike inligting oor die Hervormde Kerk én 'n inspirerende Bybelse dagboek in een omslag

Bestel by boekwinkel@nhk.co.za



Boekwinkel-promosie

Agt Bybelstudiegidse teen slegs **R399**

Bestel van mev Sarie Roux by boekwinkel@nhk.co.za

'n Gedig

Namibiese seënbede

Mag die reën jou sambreel wees
die hele somer lank in hierdie dorre land,
'n mopanievuur 'n lamp vir jou voet,
die Melkweg 'n dak vir jou kop
en mag daar 'n Toyota-bakkie wees
vir al jou goed.

Emmie Bedeker

(Uit: *Die grondgeitjie roep*, 2023)

Toerusting

- **Prof Wim Dreyer**, voorsitter van die Kommissie van die AKV, praat in 'n YouTube-opname oor **Christenwees in Suid-Afrika in 2024**. Die opname is beskikbaar by <https://www.youtube.com/watch?v=z3ejrodT3pc>.
- 'n Opname van **oudl Faan Beeslaar** se aanbieding van die tema **Geroep om ouderling te wees** is beskikbaar by die volgende skakel: <https://youtu.be/Hz7KSdJigrM?si=zEWjTR6pD0lInfDW>. Indien die skakel 'n foutboodskap gee, kan u die skakel kopieer en by Google plaas.

**Gevorderde Toerusting Ouderlinge met tema:
Ek getuig – perspektiewe vanuit Fresh Africa**

Vind plaas op
6 Mei om 19:00

Aanbieder –
dr Frikkie Labuschagne

Meeting ID: 942 768 9935
Wagwoord: SGB
<https://us02web.zoom.us/j/9427689935?pwd=d3d3K1N1cDU0a1plZCtjSS9ZSFY4dz09>

**F R E S H
A F R I C A**

- **Die Dameskring** is 'n Christelike organisasie wat groot waarde heg aan die behoud en versterking van die gesin. Sedert 2019 word 'n **Biddag vir Gesinne** jaarliks aangebied as een van die nasionale projekte van Die Dameskring. Hulle wil graag die Christengemeenskap in Suid-Afrika inspireer om weer in 2024 saam te kom om by 'n spesiale geleentheid te bid vir kerngesonde gesinne wat geestelike en morele waardes uitleef. Hulle sou graag wou meehelp dat hierdie geleentheid jaarliks deel van gemeentekalenders sal word. Die Biddag vir Gesinne, geïnisieer deur die uitvoerende bestuur van Die Dameskring, vind vanjaar plaas op **12 Mei**. Op 12 Mei wil hulle saam met gesinne kniel om te bid vir eie gesinne, vir die herstel van gesinswaardes, vir heling van gebroke gesinne, dat God ons kinders met wysheid sal seën om in uitdagende tye goeie besluite te neem, en vir die bewaring van die huwelik. Besoek www.dameskring.co.za vir meer oor Die Dameskring.

Barmhartigheid

- **Machteld Postmus-behuisingskompleks** vir bejaardes in **Brooklyn, Pretoria**, beskik oor die volgende:
 - Tweeslaapkamer-woonregeenheid beskikbaar by Frans Boshoff teen R465 400.

- Eenslaapkamer-huureenheid beskikbaar by Huis MacIntosh teen R5 330 (krag ens uitgesluit).

Kontak mev Hannelie Fourie by 012 325 1857 x216 vir meer inligting.

- **Louis Trichardt-behuisingskompleks vir bejaardes** in Danville, Pretoria, bied kamergeriewe met twee etes per dag teen R3 850 per maand. Vir meer inligting, kontak mev Yvonne Willemse of matrone Jenny Wesson by 012 386 5310.
- **Ons Tuis (Andries Marié Oosthuizen) in Parys** het plek beskikbaar in die tehuise vir versorging van verswakte bejaardes teen R9 760 per maand. 'n Volledige versorgingsfasiliteit sluit in 24-uur-versorging, drie maaltye per dag en sekuriteit. Behuisingsfasiliteite teen R5 990 per maand is ook beskikbaar op dieselfde perseel; dit sluit drie etes en weeklikse wasgoed en skoonmaak van kamers in asook gratis deelname aan sosiale programme. Vir meer besonderhede, skakel matrone Teresa Broodryk by 056 811 2185.
- **Seniordal-aftreeoord** is die eiendom van die NHKA se **Gemeente Pretoria** en spesialiseer in lewensregverkope en verhuring aan selfversorgende persone ouer as 55 jaar. Die oord is geleë in die veilige omgewing van Rietondale in Pretoria. Seniordal beskik oor 24-uur-veiligheidsdienste en toegangsbeheer, en bestaan uit die volgende woonstelle:
 - Eenslaapkamer: R515 000
 - 1½-slaapkamer: R520 000
 - Tweeslaapkamer: R560 000

Kontak Salomie Stolz by 012 329 4313 of 083 308 0520 (08:00-12:00) vir meer inligting.

- **Herfsakker Selfsorg-aftreeoord in Groblersdal:** Behuising beskikbaar vir persone ouer as 60. Geen versorging beskikbaar nie, persone moet selfversorgend wees. Geen etes word voorsien nie. Eie tuin. Tariewe is per vierkante meter en verskil van huis tot huis. Deposito van twee maande huur betaalbaar. Vir meer besonderhede, skakel Frik Rossouw by 082 830 6591.
- **Belfast Rusoord** bied onder meer 24-uur mediese versorging, CCTV, 24-uur-toegangsbeheer, drie gebalanseerde maaltye per dag, en aktiwiteite vir elkeen. Daar is fasiliteite vir semiversorging, verswakte bejaardes, en woonstelle vir selfversorging. Kontak Riana de Villiers by 013 253 31211 / 063 663 7449 / manager@belfastrusoord.co.za vir meer inligting en tariewe.
- **Athalia Uitrek in Bloemfontein** bied verblyf vir en versorging van bejaardes en persone met gestremdhede. Daar is enkel- en dekkamergeriewe in 'n huislike atmosfeer, verblyf met drie etes ingesluit, verblyf sonder versorging, en 24-uur-versorging. Navrae: 079 826 6363 / 084 023 0315 / 051 522 6089 / navrae@athalia.co.za / www.athalia.co.za.

Fondsinsamelings

- **Gemeente Welgelegen-Pietersburg: Maanligmark**
Vrydag 26 April van 16:00 tot laat
 Gratis ingang
 Stalletjies, eet- en drinkgoed, musiek
 Kattebakverkopings
 Kaartfasiliteite beskikbaar
 Navrae oor stalletjies: Elize 071 684 7803
 Navrae oor kattebakverkopings, parkering, ens: Jonita 082 854 3897
- **Gemeente Oos-Moot: Magaliesfees**
Woensdag 1 Mei van 08:30 tot 14:00
Vanuit die duister na die lig
 Collinlaan 1265, Moregloed

MC en kunstenaar Gary Forwood
Stalletjies, eetgoed, kompetisies
Kredietkaartfasiliteite beskikbaar
Kom sny en kleur jou hare vir pleegsorg (R50)
Wen **jagpakket** ter waarde van R26 600
As jy nie self kan jag nie, stuur ons 'n jagter saam met jou!
Skryf vooraf in @ R200 per trekking (trekking 1 Mei om 12:00)
Kontak Philip van den Heever 083 384 3263
Navrae oor die fees: Andries Pretorius 081 466 8691

- **'n Stukkie Marico Bosveldjuweel te koop**

Ten bate van NHKA Groot Marico

14,2 hektaar, spruitoewer-eiendom
Gerieflik toeganklik vanaf N4
Twee boorgate, een toegerus, sementdam
Huisse bouvallig, geen ESKOM
Prys R1 550 000.00 onderhandelbaar
Skakel Boet Nel by 083 700 9751

- **Oornagfasiliteite: Seniordal.** Seniordal beskik oor oornagfasiliteite vir persone wat vergaderings of kongresse moet bywoon, of wat dokters moet besoek, of verblyf benodig vir familie van persone wat in die hospitaal is. Daar is veilige parking en 24-uur-sekureit. **Vir navrae oor tariewe en vir besprekings**, kontak Salomie Stolz gedurende kantoorure 08:00-12:00 by 012 329 4318, of na ure by 083 308 0520.

Studentesake

- **Studentebehuising. Gemeente Stellenbosch** kan veilige behuising op die kerkterrein en op die kampus aan studente verskaf. Dit bestaan uit óf enkelkamers met gedeelde fasiliteite, óf eenmensewoonstelle. Skakel dr Chris le Roux by 079 495 3239 of stuur 'n e-pos na stellenbosch@nhk.co.za vir meer inligting.
- **Studentebehuising. Gemeente Philadelphia** verskaf aan studente veilige behuising by Fleur de Lis op die kerkterrein. Dit bestaan uit enkelkamers met gedeelde fasiliteite. Die behuising is binne stapafstand van die kampus en winkelsentrums. Skakel dr Sanrie de Beer by 083 226 1866 of stuur 'n e-pos na nhkphiladelphia@gmail.com vir meer inligting.

Betaalde advertensies in hierdie nuusbrieff

Advertensies waarvan 'n private individu of instansie die begunstigde is, of waarin 'n gemeente 'n projek prominent wil bekendstel, kan in hierdie nuusbrieff geplaas word. (*Tekskennisgewings van gemeentes is gratis.*) Indien 'n jpg-weergawe van die advertensie voorsien word, **moet dit 15,5 cm breed x 6,5 cm hoog wees, resolusie 1878 x 815 pixels, 150-300 dpi.**

Stuur die voorgestelde **teks van nie meer nie as 75 woorde** met of sonder eenvoudige grafika of 'n foto saam met die bewys van betaling aan mev Tessa Oppermann, per e-pos na produksie@nhk.co.za. GEEN advertensie sal geplaas word sonder die betalingsbewys nie.

Die **teks en bewys van betaling** moet mev Oppermann bereik teen 16:00 op die Maandag voor die betrokke uitgawe se verskyning. *Blitspos* word normaalweg die Woensdagoggend afgehandel en teen die middag op die webblad gelaai. Indien die plasing meer as een keer moet geskied, moet aangedui word op watter datums dit moet verskyn, met betaling vooruit vir al die beoogde plasings.

Die koste is R250 per plasing (BTW ingesluit). Die verskuldigde bedrag moet uitgemaak word aan die Raad van Finansies, ABSA tjekrekening nommer 020-000-287, takkode 632-005, **verwysing: u naam + Blitspos. Neem kennis dat die redaksie in uitsonderlike gevalle mag besluit om 'n advertensie nie te plaas nie en die adverteerder se geld terug te betaal.**

Gebed vir vrede

Hemelse Vader,
ek hunker na die vrede wat net U kan bring
in 'n wêreld wat dikwels vasgevang is
in 'n draaikolk van chaos en onmin.
Vou my onrustige hart toe
in u kalmerende teenwoordigheid,
en laat dié kalmte uitkring na elke aspek van my lewe.
Leer my om die sereniteit van u Gees uit te straal
en oral waar ek gaan harmonie te bewerkstellig.
Mag u vrede, wat alle verstand te bowe gaan,
heers in ons harte en in die wêreld.
Ek bid dit in Jesus se Naam.
Amen.

prayray.com

(Afrikaanse verwerking: Tessa Oppermann)